

Eqqumiitsuliornermik ingerlatsineq tamatuminnгалu ingerlatitseqqiisarneq pillugit Namminersorlutik Oqartussat nalunaarutaat

Eqqumiitsuliornermik ingerlatsineq pillugu Inatsisartut inatsisaanni nr. 11, 6. juni 2016-imeersumi §§ 8, imm. 3, 18, imm. 2 aamma § 19, imm. 2 naapertorlugit aalajangersarneqarpoq:

Kapitali 1

Atuuffia tapiiffigineqarsinnaatitaasullu

§ 1. Nalunaarut tapiissutit Naalakkersuisunit siunnersuisoqatigiinnilluunniit, ataatsimiititaliamit, aningaasaateqarfinnit assigisaannilluunniit tunniunneqartut, Naalakkersullu Naalakkersuisut eqqumiitsuliornermik ingerlatalinnut tamatuminnгалu ingerlatsisut aqunneqarnissaannut tunngatillugu suliaassat isumaginissaannut tamakkiisumik ilaannakuusumilluunniit tunniussimasaasa aqunneqarnissaannut atorneqassaaq.

§ 2. Tapiissutit sammisassanut tamanut Eqqumiitsuliornermik ingerlatsineq pillugu Inatsisartut Inatsisaanni § 8, imm. 1-imi aalajangersarneqartunut tunniunneqarsinnaapput.

§ 3. Tapiissutit makkununga tunniunneqarsinnaapput:

- 1) Eqqumiitsuliornermik ingerlatsinermut tamatuminnгалu ingerlatitseqqittarnermut eqqumiitsuliortup suliaqarneranut, ineriartortitsineranut tunisassiorneranullu, aamma
- 2) Kalaallit Nunaanni eqqumiitsuliornermik ingerlatsineranut nunanilu allani kalaallit eqqumiitsuliaannik allanik saqqummersitsinermut ingerlatitseqqiisarnermullu atatillugu suliffinnut, suliffeqarfinnut, suleqatigiiffinnut assigisaannullu.

§ 4. Eqqumiitsuliornermik ingerlatsinerup tamatumalu ingerlateqqittarnissaanut eqqumiitsuliortumut tapiissutit, tak. § 3, imm. 1, eqqumiitsuliortunut qinnuteqarnerup nalaani Kalaallit Nunaanni aalajangersimasumik najugaqartumut tunniunneqassapput.

§ 5. Kalaallit Nunaanni eqqumiitsuliornermik ingerlatat nunanilu allani kalaallit eqqumiitsuliaannik saqqummersitsinissamut ingerlatitseqqinnissamullu tapiissutit, tak. § 3, imm. 2, suliffinnut, suliffeqarfinnut, suleqatigiiffinnut assigisaannullu Kalaallit Nunaanni najugalinnut tunniunneqassapput.

Imm. 2. Ingerlatsinermut tapiissutit pineqarsimangippata tapiissutit taamaallaat ingerlatitseqqittoqarnissaanut suliniutinut tigussaasunut atatillugu tapiissutit tunniunneqassapput.

Kapitali 2

Tapeeriaatsit

§ 6. Qinnuteqartoqareerneratigut qinnuteqartunut tapiissutit makku aqqutigalugit tunniunneqassapput:

- 1) Suliniutitut tapiissutit, tak. § 7.
- 2) Sulinissamut tapiinerit, tak. § 8.
- 3) Tapiissuteqarnissamut qularnaveeqqusiinerit, tak. § 9.
- 4) Utertitsinerit, tak. § 10.
- 5) Ingerlatsinermut tapiissutit, tak. § 11.

§ 7. Suliniutitut tapiissuteqarnermi paasineqassapput sammisassanut piffissami killilimmi ingerlanneqartunut aammalu tigussaasumik anguniagaqarfusunut imaluunniit inaarutaasumik angusaqarnermut tapiissutit.

Imm. 2. Suliniutitut tapiissutit suliniutitut qinnuteqarfup nalaani ukiut 5-it iluanni naammassineqartunut tunniunneqarsinnaapput.

§ 8. Sulinermut tapiisoqarnerani tapiissutit sulinerup ingerlanneranut imaluunniit eqqumiitsuliornerup ingerlanneranut tapiissutit pineqarput.

Imm. 2. Sulinermut tapiissutit qaammammut aalajangersimasumik aningaasartalerlugit piffissamilu killeqartumi tunniunneqassapput. Kultureqarnermut Naalakkersuisoqarfik aningaasat qaammammut tunniunneqartartut amerlanerpaaffissaannut piffissaliunneqartumullu killeqartumut aalajangersaasinnaavoq.

Imm. 3. Sulinermut tapiissutit eqqumiitsuliortunut tapiissuteqarnerup nalaani tamakkiisumik suliffeqarnikkut akissarsiatigut peqatigitillugu aningaasarsialinnut imaluunniit pisortanit aningaasanik tiguisartunut inuuniarnikkut aningaasartuutit matussusernissaannik tamakkiisumik siunertalinnut tunniunneqarsinnaanngillat.

§ 9. Tapiissutitut qularnaveeqqusiineri paasineqassaaq tapiissutit tunniunneqassasut tapiissutit tunniunneqarneranni piumasaqaatit naammassineqarsimappata.

§ 10. Utertitsineri paasineqassaaq aningaasartuutaasimasunut kinguneratigut ajunngitsorsiassarsineq, tassanilu aqutsisumit toqqaannartumik ajunngitsorsiassanik pisinnaasutut akuerineqarsimasunut.

§ 11. Ingerlatsinermut tapiissutit paasineqassapput sammisarisanik ingerlatsinermut ingerlaavartumik aningaasartuutit matussusernissaannut tapiissutit, tamatumunga ilanngullugit sulisorisanut, ininut allaffissornermullu aningaasartuutit.

§ 12. Aqutsisoq eqqumiitsuliornermut suliassaqarfinnut ataasiakkaanut tunngatillugu tapeeriaatsit sorliit atorneqarsinnaanerannut najoqqutassanik sukumiinerusunik aalajangersaasinnaavoq. Najoqqutassat Kultureqarnermut Naalakkersuisoqarfimmit akuerineqassapput, kinguneratigullu tamanut saqqummiunneqarlutik.

Kapitali 3

Tapiissuteqarnissami piumasaqaatit

§ 13. Tapiissutit Naalakkersuisut eqqumiitsuliornermik ingerlatsinermut tapiissuteqartarnerannut tunngavigineqartut Eqqumiitsuliornermik ingerlatsineq pillugu Inatsisartut Inatsisaanni aalajangersarneqartut tunngavigalugit tunniunneqartarput.

Imm. 2. Aqutsisoq Eqqumiitsuliornermik ingerlatsineq pillugu Inatsisartut Inatsisaanni tunngavigineqartut ataqqillugit qinnuteqaatit pingaarnersiorneqarnissaannut najoqqutassanik sukumiinerusunik aalajangersaassaaq. Najoqqutassat Kultureqarnermut Naalakkersuisoqarfimmit akuerineqassapput, kinguneratigullu tamanut saqqummiunneqarlutik.

§ 14. Makkununga tapiissuteqartoqarsinnaangilaq:

- 1) Sammisanut qinnuteqartup nalinginnaasumik missingersuutaasa iluanni akilerneqarsinnaasutut naatsorsuutigineqartunut.
- 2) Sammisanut qinnuteqarsinnaanermut piffissaliussap nalaani aallartinneqareersimasunut, matumani utertitsisoqarnissaa pineqarsimanngippat.
- 3) Nittartakkanik pilersitsinermut ingerlatsinermullu.
- 4) Ilinniarnernut pikkorissarnernullu.
- 5) Sakkunik, atortunik, nipilersuutinik, pequtinik qarasaasianik softwarenillu pisinermut, taamaattoq tak. imm. 2.
- 6) Saqqummersitseqqinnernut, atuakkat cd-llu ilanngullugit.

Imm. 2 Sakkunik atortunillu pisinermut tapiisoqarsinnaavoq, tamanna suliaqarnermut imaluunniit suliap suliarineqarneranut aalajangiisuulluni pingaaruteqarpat.

Kapitali 4

Qinnuteqariaaseq tapiissutillu tunniunnerisa tamanut saqqummiuttarnerat

§ 15. Tapiissutit pillugit qinnuteqaat qinnuteqarfissat ilaat aqutsisumit suliarineqartoq tunniunneqartorlu aqqutigalugu elektroniskinngorlugu tunniunneqassaaq.

§ 16. Tapiissutit pillugit qinnuteqaat suliassap tapiiffigineqartussatut qinnutigineqartup nassuiarneranik, tapiissutillu qanoq ittut qinnutigineqarnersut pillugit nassuiarneranik imaqassaaq.

§ 17. Tapiissutinut ukiumut arlaleriarluni qinnuteqartoqarsinnaavoq.

Imm. 2. Qinnuteqarnissamut piffissaliussat aqutsisup aalajangersaaffigalugillu tamanut saqqummiutissavai.

§ 18. Aqutsisoq ukiumoortumik tapiissutit agguaanissaannut ukiumoortumik nassuiaasiussaaq tamanullu saqqummiussilluni, taakkulu ukununga agguataarneqarput:

- 1) eqqumiitsuliornermut suliassaqrarfiit ataasiakkaat tapiissutillu eqqumiitsuliornermi suliassaqrarfiit akimorlugit ingerlanneqartut,

- 2) tapeeriaatsit ataasiakkaat,
- 3) tiguisussap najugaqarfia, kommunekkaarlugu naatsorsorlugu,
- 4) tiguisussap suaassusaa,
- 5) tiguisussap ukiui, ukiut akuttussusaat naleqquttut naatsorsorlugit, aamma
- 6) ukiuni siuliini tiguisartut nutaat pisoqqallu.

Kapitali 5

Tapiissutit naatsorsuiffigineri, kukkunersiorneqarneri kiisalu atorunnaarsinneri utertitsissutigiginissaallu

§ 19. Suliniutitut tapiissutininik tiguisartut suliniutip naammassinerata kingorna kingusinnerpaamik qaammatit pingasut qaangiunnerisigut tapiissutit atorneqarnerinut naatsorsuutininik atsiukkanik aqutsisumut nassiussissapput.

§ 20. Suliniutitut tapiissuteqarnermi tapiissutit 150.000 kr.-nit ataassimappagit kukkunersiuiinissamut piumasaqaateqanngilaq. Naatsorsuutit tapiissutininik tiguisup atsiorsimasai naammapput. Tapiissutininik tiguisup atsiornermigut uppersarsassavaa, naatsorsuutit eqqortuusut, tapiissutininik tiguisoq aningaasaqarnermut tunngatillugu pisussaaffinnik mianerinnessimasoq aamma tapiissutit siunertamut atorneqarsimasut.

Imm. 2. Suliniutitut tapiissutit 150.000 kr.-nit ataallugit tapiissutininik tiguisoq tapiissuteqartartumit ataatsimit arlalinnilluunniit tapiissutininik tigusaqarsimappat tapiissutininik tiguisoq tamanna pillugu uppersarsaatissanik aqutsisumut nassiussissaaq.

Imm. 3. Tapiissutininik ikinnerpaamik 150.000 kr.-ninik tiguisoqarsimappat naatsorsuutit kukkunersiuisumit naalagaaffimmit akuerineqartumit nalunaarsorneqartumilluunniit kukkunersiorneqarsimassapput.

§ 21. Ingerlatsinermut tapiissutininik tiguisut tapiissutit tunniunnerisa ukiup ataatsip qaangiunneratigut kingusinnerpaamik 1. juni ukiumoortumik naatsorsuutininik kukkunersiuisullu tapiliussaani aqutsisumut nassiussissapput.

Imm. 2. Ukiumut naatsorsuutit kukkunersiuisumit naalagaaffimmit akuerisaasumit imaluunniit kukkunersiuisutut nalunaarsukkamit kukkunersiorneqarsimassapput.

§ 22. Kukkunersiuiineq kukkunersiuiinermi ileqqut pitsaasut naapertorlugit suliarineqassaaq.

Imm. 2. Kukkunersiuiinermi ilaatigut makku misissoqqinneqassapput:

- 1) Naatsorsuutit eqqortuunersut pingaarutilinnillu kukkuneqaratillu amigaateqannginnersut.
- 2) Tapiissuteqarnermut piumasaqaataasut naammassineqarsimanersut.
- 3) Tapiissutit siunertarineqartumut atorneqarsimanersut.
- 4) Tapiissutininik tigusaqartoq aningaasaqarnermut tunngatillugu pisussaaffinnik mianerinnessimanersoq.
- 5) Paasissutissat tapiissutininik tiguisup suliniutigineqartoq suliarluunniit pillugit aqutsisumut nalunaarutigisimasai uppersarsarneqarsimanersut.

Imm. 3. Aqutsisoq naatsorsuutit misissuiffiginissaannik suliaqassaaq.

§ 23. Tapiissutit akuerineqartut imatut pisoqarsimappat tamakkiisumik ilaannakortumilluunniit uterteqquneqarsinnaapput:

1) Tapiiffigineqartup tapiiffigineqarnissamut piumasaqaataasut naammassisinnaajunnaarpagit.

2) Tapiiffigineqartup tapiissutitut akuersissutigineqartunut piumasaqaataajunnartut naammassinngippagit.

3) Qinnuteqartoq eqqunngitsunik paasissutissiisimappat.

4) Tapiissutininik tiguisoq paasissutissanik pingaarutilinnik nassiussinissamik itigartitsisimappat, taakkunungalugu naatsorsuutit ilaapput.

§ 24. Aqutsisoq qaqugukkulluunniit tapiissutininik tiguisoq suliassamut tapiiffigineqartumut paasissutissanik pingaarutilinnik nassiusseqqullugu qinnuiginnissinnaavoq.

Kapitali 6

Atuutilersitsinermut ikaarsaarnermullu aalajangersakkat

§ 25. Nalunaarut ullormi 1. januari 2022 atuutilissaaq.

Namminersorlutik Oqartussat, ulloq 17. decemberi 2021

Peter Olsen

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Karsten Peter Jensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

